

Prome acuerdo di paisnan den reino durante conferencia di salud

Un encuentro historico a tuma luga ayera den edificio di "Cocolishi" entre e Ministernan encarga cu salud di respectivamente Aruba, Corsou y Hulanda. Pa prome biaha den historia di Reino cu Ministernan di Salud di Reino a reuni.

E mandatarionan a participa den transcurso di dialuna den un Consulta Ministerial riba e topico di 'International Health Regulation'. E resultado tabata firmamento di un acuerdo interno na final di e prome dia di e 'Health Care Conference Aruba' (HCCA). Ta trata di un acuerdo importante ya cu e 'International Health Regulation' (IHR) ta



papia di entre otro e standard y reglanan cu mester cumpli cun'e pa ta debidamente prepara pa, por ehempel, malesanan contagioso. Manera ta conoci y a ripara den e caso di Chikungunya, nos region ta particularmente sensibel pa

su industria turistico y comercio, entre otro.

"Mi ta hopi orguyoso cu nos a yega na acuerdo pa implementa e IHR y reenforza otro hunto pa cumpli cu e reto di malesanan contagioso y otro retonan cu nos den cui-

do medico," asina Minister Hulandes di Salud Publico, Edith Schippers a duna di conoce net prome di a firma e documento.

Di su banda, e homologo di Corsou, Minister Ben Whiteman a indica cu e ta kere cu esaki ta un logro importante. "E lucha conta malesanan infeccioso ta birando mas intenso. Esaki ta un asunto hopi importante y mi ta contento di wak cu nos den Reino Hulandes ta avansando," el a agrega.

Pa finalisa, anfitrión di e conferencia, Minister di Salud Publico di Aruba, Alex Schwengle a expresa su satisfaccion di por a sinta, papia y yega na un acuerdo. "Haci e islanan consciente di e peligernan di nos limitacionnan ta cuminsa cu e realisacion cu nos no por haci tur cos riba nos mes."

E di dos dia di HCCA ta habri awe mainta cu e tema 'For di Cuido Medico Dirigi riba Produccion pa Dirigi riba Calidad' bou direccion di dr. Ashley Duits y cu otro tres orador invita treciendo mas informacion relaciona cu e tema aki. □

